

■ COLUMNA

Taglia sin energia?

DA JOST FALETT

Dapi passa 20 onns datti iniziativas per reducir il diever d'energia betg regenerabla. En Grischun è pader Flurin Maisen stà pionier per promover energias alternativas. Gia el ha constatà: «Entant che l'ieli e l'energia atomara èn uschè bunmartgads na sa mida prest nagut.» Nus sfarlattain l'energia en moda irresponsabla: Igl è pli bunmartgà da stgaudar che dad isolar la chasa – dad importar ovs da la Danemarca e tschuts da la Nova Zelanda che da cumprar products indigens – da cumprar mobiglia da l'Ikea enstagl dal scrinari da vischnanca, da sgular en vacanzas da l'autra vart dal mund empè da restar pli manaivel...

Etge èn las consequenzas da quel enorm diever d'energia? Energia na sva nescha betg, ella sa transformescha be, finalmain adina en chalur. E cun arder ieli e benzin laschain nus or en paucs decennis en l'atmosfera il CO₂ che la natira ha lià durant milliuns dad onns. Quai stgauda il clima. Sch'i plova lura en november enstagl da naiver – sche la naiv na vegn betg pli gratuita giu da tschiel – patescha noss turissem. Sche las setgiras s'augmentan ed ils deserts creschan, migreschan ils



pertutgads – e rivan fin tar nus. Il stgaudament dal clima n'è betg pli in scenari, el è realità – ed el custa.

Ils transports èn memia bunmartgads. Cun in pretsch d'energia che cumpigliass er ils custs secundars da l'energia fiss ina gronda part dals problems ecologics schliada. E sche ieli, benzin ed energia atomara daventan pli chars rendi da promover nossas energias regenerablas che la natira ans porscha davant porta: Nossas ovras idraulicas e nossa laina daventan puspè attractivas. I dat plazzas da lavur per il mastern indigen per metter sin tetg implants solars e per isolar nossas chasas. Ed ils products indigens da noss purs daventan puspè abels da concurrer sin fiera ad in pretsch degn da la lavur purila.

Ils 8 da mars pudain nus l'vuschar sur da l'iniziati-

va per ina taglia sin energia. E sco tar las votaziuns da pli baud tuni puspè: «L'idea è gista, ma betg uschia» – «Da princip d'accord, ma betg ussa». I dat adina ina stgisa per esser cunter. Natiralmain che l'iniziativa ha flaivezzas: La cumpensaziun da la taglia sin la plivalur è problematica ed il pass è memia grond per vegnir acceptà. L'iniziativa na vegn ad avair naginas schanzas. Tuttina sper jau ch'ella fetschia bunas vuschs. La direzziun è gista. In nausch resultat vegniss interpretà sco: «Il pievel vul energia bunmartgada» ed engrevgiass er projects en il futur per reducir il diever d'energia – che è a media e lunga vista inevitabel.

Idovra in cler signal: L'energia betg regenerabla sto daventar pli chara. I dovra in signal a favur da nossas energias regenerablas indigenas, da plazzas da lavur per noss mastern, da main transports da martganzia tras tut l'Europa e sur l'Ozean, da main sgols uschè bunmartgads. Las energias regenerablas èn meglras, dentant: Be l'energia betg duvrada na stgauda enavant nos mund. Nus dain enavant main problems a noss uffants sche nus reagin ussa.

jost.falett@rumantsch.ch